

# QUÆSTIO MEDICA,

QUOD LIBETARIIS DISPUTATIONIBUS,  
manè discutienda in Scholis Medicorum,  
die Jovis decimâ-octavâ Novembris.

M. URBANO LEAULTE', Doctore  
Medico, Præside.

*An qui fermentationis, ille & hominis Naturam nescit?*

## I.

**Q**UISQUIS aut Sapientiæ studio aut Medicinæ operam dedit, humani corporis scientiâ gloriatur. Quidni? puderet eum videri se ipsum nescire à quo naturæ totius cognitio expectatur. Sed quotusquisque eorum est qui præter aut visus aut tactus potestatem in eâ re excutisse agnoscatur? Singularum corporis partium nomina vel merè Latina vel Græco detorta fonte magnificè proferuntur, sua cuique facultas attribuitur, usus assignatur, omnium causâ his illisve qualitatibus, primis, secundis, tertiis, occultis accepta refertur, has inter honos præcipuus habetur calori qui in capite spiritus animales, vitales in corde, in ore, ventriculo, totâ alvo infimâ naturales præparare, elaborare, perficere perhibetur. O laudem egregiam! O ampla spolia! aut vanas opinionum species, velut ægri somnia, sibi in animum induxisse, aut dissectionis labore improbo id unum detexisse quod vel naturæ rerum imperitissimus assequi possit. Hæc omnia aut non absurda aut etiam vera sint, quisquis sibi in detegendâ hominis naturâ docti famam comparare volet, progredietur ulterius & per obstantes sciorum catervas sua explicans arma, naturâ sinui se immerget, ibi, quæ deceat Philosophum, latentem, Physicam & efficientem omnium humani corporis functionum causam sedulò indagaturus.

## II.

**C**ORPORIS humani fabricam nosse non superficialiam illam quidem sed intimam & cortice vel spississimo obvolutam alicujus pretii nec immerito haberi debet. Sed quantumlibet in ea quis versatus oculatusque sit, nihilo *φαιδωρότερος* erit reputandus, dum variarum quibus continuo exagitur motuum causam repererit, quam si quis contemnat, rerum

quidem sensibus subiectarum haberi poterit eximius explorator, in humanæ vero naturæ scientiâ parùm aut nihil promovissè merito existimabitur. Hanc ut quis obtineat, ipsa ei naturæ principia adcunda sunt, non quælibet sed certa quædam. Eorum triplex ordo potest constitui; Omnium prima & simplicissima atomi habeantur, solâ mentis acie perceptibiles; secundum occupent locum quæ resolutionis Chymicæ auxilio detecta sunt: Postrema & compositissima terram, aquam, aerem, & ignem putato. Primorum contemplatione parùm in disquirendâ Hominis naturâ utilitatis percipiuntur, ut quæ eâ exiguitate prædita sint quam nulla assequi valeat sensatio vel exquisitissima? Ultima jure etiam contineri possunt, mixtorum naturæ magis quam principiorum affinia: Te confer ad ea potius quæ simplicitatis moderationem habent, spiritum scilicet, sal, sulphur, aquam & terram in quæ corpora fere omnia ignis beneficio ultimò resolvuntur. Hæc invicem tenacissimè conglutinata pace altissimâ perfruuntur, datâ vero occasione explicata & sibi permixta pro iis quas gerunt inter se inimicitis & diversis ad motum huc illucve propensionibus mirum quâ sæpe exagitantur vehementiâ, quas turbas concitent, verbo dicam fermentationem exsuscitant, primam, præcipuam, & efficientem cùm omnium naturæ operum, tùm etiam humani corporis functionum causam.

## I I I.

**F**ERMENTATIONIS Natura ejusque ad explicanda Naturæ phænomena necessitas, astunde quam ab Hippocratis scholâ repetere inane est. Ejus prima origo & remotissima ab atomis; hæc variis ornata figuris, specie determinatis, numero indefinitis & assiduo concitata motu, coalitu inter se mutuo moles quasdam efformant exiguas, ægrè omnino & rarenter solubiles; ab his invicem conglutinis spiritus, sulphur, sal, aqua & terra enascuntur, sensibilia rerum omnium principia. In horum unoquoque seorsim posito nulla unquam perturbatio observatur, ex quibus enim constant molecule homogeneæ sunt & eandem ad motum propensionem ac determinationem habent. Iis vero simul compositis, præ nîs quo à se invicem separari natæ sunt, assiduo eoque diverso, seipsis interdum, aliàs fermenti alicujus extrinsecus occurrentis occasione datâ ad motum invitantur. Hic motus fermentatio appellatur. Discrepat ab effervescentiâ; hæc ad solas corporis mixti partes integrantes pertinet, Naturam ejus & essentiam non attingit, eamque duntaxat in eo immutationem creat quæ tactûs aut visûs judicio discerni & explorari possit; Illa motus est intestinus principiorum corporis naturalis quo nexus eorum & ordo immutantur. Si à se invicem omnino dissident rem ipsam quam constituunt destrui, aliam oriri necesse est. Si quadantenus duntaxat, ea solum contingit alteratio quæ aliter gustum & olfactum quam antea afficiat. Fermentationem nativo atomorum & moleculearum ex iis emergentium motui præcipue adscribendam non mediocriter adjuvat ea salis species quæ aciditatis sensum excitare nata est; principiiis corporis cujuslibet vel ad motum valde dispositis vel jam nonnihil exagitat

immiscens sese, particularum quibus constat acie longe acutissimâ ea tundit discerpit & à se inuicem contentione non levi discriminat. Calculum ponet quam optimè, qui fermentationi his fontibus natæ rerum omnium generationem durationem, interitum tribuerit; hominis quoque, in quo quiddam virtutis corporeæ animadvertitur, aut nesciri aut à fermentationis motu tantam causâ primariâ, præcipuâ & efficiente repeti debere agnoscendum est.

## I V.

**N**ATURA omnis quanta quanta est fermentationis in rerum omnium productione vim & potestatem prædicat. Plântarum ei vegetatio, generatio animalium, lapidum mineralium metallorum debetur elaboratio. Atque hæc quidem probabile est, ex humido certâ quadam ratione fermentato & coaguli salisve cuiusdam fixi interventu concresecere; Num ea causa habenda est quamobrem veteres quidam Philosophi inter quos Hippocrates, aquam ceu humidum rerum omnium principium statuerunt? Quod si ad plantas te convertes magis res patebit, semen terræ mandatum halitibus ab ea profectis, & tenuissimâ mobilissimâque quam sol suppeditat materiâ, interius exagitatum emollitur & dehiscit, accedit aqua pluvialis, ut variis salium repleta generibus sic ad movendam fermentationem aptissima. Hinc lobi explicantur, germinis fibrillæ panduntur, radices prodeunt, folia attolluntur. Hæc fermentationi dubitas esse tribuenda? Vide quanta eorum omnium facultas sit ad promovendam vegetationem apud quæ ampla salis volatilis copia observatur. Idem de animalibus existimato; vel homo cæteris longe antecellens tantulæ rei debet quod nascatur. Muliebri semine ovi naturam præ se ferens quid prodest? nisi virilis accessione fecundetur; quod alio obtineri quam fermentationis nomine cæcus sit qui contendat. Ecquid enim eam in muliebri semine virile non moveat quod tot venæ, arteriæ, nervi, vasa lymphatica, glandulæ spirituosum, spumofum & fermenti validissimi undequaque insignibus splendidissimis quasi delibutum suppeditant. Hujus itaque impulsu seminis materni particulæ motu intestino exagitatae, explicant se, tumultuantur, tandiuque dimicant dum hominis tandem aliqua primùm species prius latitans expromatur, ab eadem postmodum à quâ originem duxit fermentatione incrementum ultimamque perfectionem adeptura. Ad hæc qui seriò attenderit, contumax sit si ignoratâ motus hujus intestini naturâ ad accuratam humanæ naturæ cognitionem aut pervenisse se contendat aut speret unquam usquam perventurum.

## V.

**Q**UODCUNQUE in humano corpore obitur munus fermentationis virtute absolvitur, coctiones procurat omnes, liquores quosque nativo caractere exornat, excernit superflua: ut se habet, vel naturæ votis consentiens, vel ab iis aberrans, aut sanitatem servat integram aut morbum accersit vel sub utroque casu eadem singularum partium configuratione & structurâ

4

remanente; ut hæc causâ sine qua stare non possumus, fermentatio effici-  
cientis & primariæ meritò rationem obtineat. Et certè quid referret ad  
Chylosin interiorem ventriculi tunicam totuplici glandularum serie esse op-  
pletam; quæ ei incumbit, fibris omnigenis muscutorum vices sustinentibus  
esse intertextam. venarum, arteriarum, nervorum, vasorum lymphaticorum  
furculos innumerabiles per totam ejus substantiam dispergi, si cessaret fermen-  
tatio vel perperam & vitiosè obiretur: Quin ipse chylus per venas arterias-  
que distributus minime naturam mutaret suam nisi veterascens cui admis-  
cetur sanguis fermenti ei officium largiretur: Idem esto de reliquis succis  
huc illucve impulsus judicium. Frustrâ hîc ad calorem nulliûs apud nos imò  
nec alibi uspiam efficaciz confugeris: nisi calor is nomine non nudam, quod  
plerique tamen fere omnes faciunt, qualitatem intellexeris, sed materiæ parti-  
culas ita & figuratas & fermentatione exagitatas ut ad eas admota manus  
sensationem experiat quandam caloris denominatione vulgo notatam, rei ipsi  
quæ tangitur ineptissime attributam. Has mihi crede omite nœnias, his delira-  
mentis abstine. Si veram Philosophi & studiosi naturæ indagatoris personam su-  
stinere ac defendere velis, consule fermentationem, eâ detectâ naturam tibi  
hujus mundi universam atque hominis singularem representabit, nihil te in  
vegetabilibus, nihil latebit in animantibus, eorum ortûs, durationis interiûs  
causas dignosces; Putrefactionum omnium, dissolutionum, præcipitationum,  
congelationum deteges originem, verbo dicam hominis quoque natura eva-  
det perspicua nullâ unquam usquam aliâ ratione penitus detegenda.

*Ergo qui fermentationis, ille & hominis Naturam nescit.*

### Domini Doctores disputaturi.

*M. Franciscus Faustus Allior,  
M. Joannes-Baptista Dadart.*

*M. Amandus Doué.  
M. Franciscus Gouët.*

*M. Petrus Crescé.  
M. Alexander Michael Denyan.  
Professor Regius.*

*M. Philippus Doué.*

*M. Nicolaus Brunel  
de la Carlière.*

*M. Claudius de Fradet.*

Proponēbat Parisiis ANDREAS CRESSE', Parisinus,  
Baccalaureus Medicus. A. R. S. H. 1694.

---

Apud Franciscum Muguet, Regis & Facultatis Medicinæ Typographum.